




PAULI TARENGHI ROMANI

DE PACE

ELEGIAE.





ELEGIA I.

**D**UM furit, & miseros urget Bellona tumultus,  
 Dum procul inflata personat astra tuba,  
 Tunsæ sinum, laniata comas, oblita sorores,  
 Exulat e nostris Pax bona limitibus.  
 Sparsa jacent oleæ felicia germina quondam,  
 Scissaque de nitido corpore vela cadunt.  
 Fluctuat interea dubioque exterrita motu  
 Incertos jactat Diva benigna pedes.  
 Vellet in extremi consistere finibus orbis,  
 Vellet in aërio ponere membra jugo;  
 Aut latitare cavi scabro sub fornice saxi,  
 Aut nova cæruleum Nympha tenere fretum.  
 Anxia sed curis mens, & furialia Martis  
 Arma vetant; armis omnia fœta videt;  
 Nec quo se possit tutari robore, nec quæ  
 Sit spes in tanto prospicit exitio.  
 Ergo mœsta, gemens, atque intermixta dolore  
 Verba profata, sibi cuncta sinistra canit.  
 Illa canit; Patris at sortem miserata nefandam  
 Protinus auxilio provida cura subit;  
 Aligerumque vocat flaventi crine Ministrum,  
 Quoque levanda docet sint mala tanta modo.

#### IV

Constitit & præcepta piis ille auribus hausit,  
 Mox externatam se tulit ante Deam.  
 Adspectu Pax alma parum recreata decoro  
 Obstupuit summi nescia consilii.  
 Sed miseram blando solatur Nuncius ore,  
 Mœstaque nectareo corpora rore beat;  
 Nec mora; fide Deo, Pax o mitissima, dixit:  
 Ipse tibi cœlo spes data, certa salus.  
 Multa prius nobis visenda miserrima, quam tu  
 In nitidis iterum vecta vagere rotis.  
 Nunc opus aeriis decedere tractibus, inque  
 Pergere squalentes & sine luce domos.  
 Sancta veni, nec te pigeat venisse sub umbras:  
 Hic nitor umbrarum discutit omne genus.  
 Dixerat ille; favens Dea dicta secundat, & ultro  
 Læta meat propere quo meat ille gradu.  
 Invia terrarum lustrant loca passibus æquis,  
 Nunc mare, nunc montes, nunc pede rura premunt.  
 Denique in ignoti consistunt tramite luci,  
 Vadenti duplex qua via pandit iter.  
 Dexterâ flore novo pars aucta renidet, acutos  
 Læva tenet scopulos, & riget usque gelu.  
 Aliger hic: tristis ne te conturbet imago,  
 Diva, loci: bonus huc te jubet ire Pater.  
 Sic ait, & dextra comitem fulgente prehendit,  
 Ducit & abrupti sub cava saxa specus.

❧ V ❧

Illic æterni manibus constructa Tonantis  
 Se caliganti regia tollit humo.  
 Hinc atque hinc rupes geminæ celsissima surgunt  
 Culmina, liventi quas lacus ambit aqua;  
 Claustaque ferratum præcingit inhospita vallum;  
 Eductæ rigido stant adamante fores.  
 Vestibulum servat districtis ensibus agmen  
 Aligerum, summi turba ministra Patris:  
 Et jacit admixtos nebulis nigrantibus ignes,  
 Intentatque graves ore manuque minas.  
 Quæ postquam tacito lustrarunt omnia vultu,  
 Dux premit admota limina sacra manu.  
 Objicibus tetrum patuit penetrale reclusis,  
 Et vasto comites inseruit gremio.  
 Dispulit affusas lux Alitis alma tenebras,  
 Strataque visa trucis sanguinolenta soli.  
 Sub trabibus pallens hæret color, efferæ signant  
 Funera, quæ muris plurima picta jacent.  
 Sunt dolor & lacrymæ, sunt agmina densa malorum.  
 Adsita, & innumeris flagra notata modis.  
 Tum medio legitur peraratum fornice carmen:  
 „ Me posuit quondam Numinis ira domum.,,  
 Diva stupet, cupidisque oculis & mente tenaci  
 Cuncta notat, vati non reticenda pio.  
 Scilicet adstabant distincta ex ordine quotquot  
 Intulit ingratis Numinis ira viris.

## ❧ VI ❧

Strata per undisonos jactabat corpora tractus  
 Immenso veniens agmine diluvies.  
 Naufraga supplicibus complebat sydera votis  
 Turba, sed effusi quæ rapuere Noti.  
 Scindebat canos pinus Noëtica fluctus,  
 Unaque gurgitibus stat super, una natat.  
 Nec minus ex alia flagrabant parte Gomorrhæ  
 Compita, & obscuras flamma vorabat opes.  
 Stant Sodomæ pariter consumpta bitumine regna,  
 Incæstumque haurit nigra favilla nefas.  
 Lothus inoffensi pergit per itinera callis,  
 Juraque naturæ non teneranda colit.  
 Nec procul Ægyptus quæ pertulit horrida quondam  
 Damna, jacent formis indita terrificis.  
 Hic tegitur spissis tellus adoperta tenebris,  
 Hic fluit infecto sanguine Nilus adhuc.  
 Sunt & ranarum, turba importuna, catervæ,  
 Plurimaque in lætis fusa locusta satis.  
 Natorum primo truncantur corpora somno,  
 Indeplorata quæ cecidere nece.  
 Regalesque rubri sub gurgite marmoris alto  
 Præcipitant currus, barbaricæque manus.  
 Cernitur Assyriæ cædes nocturna phalangis,  
 Fulmineoque ferox Angelus ense micat.  
 Adstant & Solymæ miserabilis oppida fundo  
 Diruta, & hostili tecta cremata face.

## VII

Impius augusti proculcat fragmina templi  
 Miles, Romana turgidus in chlamyde.  
 Plurima præterea monumenta furoris in atró  
 Abdiderat Superum Rex hominumque loco.  
 Singula quæ lento Pax lumine dispicit, & se  
 Colligit, & misera flet super historia.  
 Ast oculos ubi mœsta parum detorsit, inanem  
 Pictura sedem conspicit ecce Dea.  
 Substitit attonitæ similis, caussamque rogavit;  
 Aliger hanc roseo reddidit ore comes.  
 Auspice supremo sata Numine Diva, bonisque  
 Pax hominum primis edita temporibus;  
 Dissidii quæ caussa tui sit maxima, quodque  
 Sit caput infandi scis, miseranda, mali.  
 Gallia sacrilegis confidentissima factis  
 Exerit armigeros in tua damna globos.  
 Et quatit impulsu cælum terrasque procaci  
 Impia, prognatos quæ Babylone refert.  
 Nec dubitat Stygii vires accire Tyranni,  
 Nec valet ingenitam barbariem exuere.  
 Ergo suppliciis jamjam torquebitur, omnes  
 Quæ superent captus, exitiumque ferant.  
 Plorabit natos mater captiva peremptos,  
 Et volet in molli figere tela sinu.  
 Conjugis ante pedes conjux cadet icta, requireret  
 Fervidus abductæ virginis ora procus,

## ❧ VIII ❧

Terra novas fruges, & tempestiva negabit  
 Poma, nec invisos Flora beabit agros.  
 Civica luctisono pulsabunt æthera quæstu  
 Agmina, & in superos jurgia sacra voment;  
 Tum vero in media Discordia gente tonabit,  
 Circumagetque truci torta flagella sono.  
 Quid referam gravidos miscentes omnia nimbos,  
 Succussum crebro quidve tremore solum?  
 Tandem victa cadet, justaque Lutetia pœna  
 Probra luet: meritum sentiet ægra jugum.  
 Libertas patrium fugiet lymphata sub Orcum,  
 Fœdifrágumque prement ferrea vincla genus.  
 Post mala tot, summi saturas post Vindicis iras  
 Pingentur vacua facta tremenda domo.  
 Idcirco tetri pars imperfecta theatri  
 Magna manet: magni criminis ille locus.  
 At tu freta Deo perfer fortissima casus  
 Diva tuos, nimio nec cade fracta metu.  
 Sic ait, & dextra comitem rapit acer amica  
 Ocyus, & cæcis erigit e latebris.  
 Strident, & verso clauduntur cardine portæ,  
 Illa tenet superas, & tenet ille plagas.

F I N I S.



ELEGIA II.

**P**Ulchra sedens, Horisque parens invecta puellis  
 Ibat purpureo sparsa colore dies.  
 Ecce autem Dea jussa nigros abjecit amictus,  
 Ornavit flavas non sine flore comas.  
 Pendent e niveo festiva monilia collo,  
 Subnectit tenerum zona corusca latus.  
 Auratæ fulgent ocreæ, surasque coercent,  
 Implicat innocuas mitis oliva manus.  
 Tum vero celeremus ait bonus Aliger: illa  
 Læta movens animo plurima, tendit iter.  
 Pallentes violas, argentea lilia felix  
 Litus habet, rident gramina, myrtus olet.  
 Tandem clivosæ veniunt ad culmina terræ,  
 Qua fluit aurifera lucidus amnis aqua,  
 Qua volucres mira complent dulcedine mentes,  
 Ingeminat blandos qua levis aura jocos.  
 Dixeris Elysium minus hoc fulgere viretum,  
 Hesperidumque putes horrida rura nemus.  
 Huc ubi deventum: comes, o comes ore Minister  
 Intonat: hæc nostri meta laboris erit.  
 Perge sub hunc cernis quem se demittere collem,  
 Perge: tenet facilis vallis amica viam.

❧ X ❧

Diva capit pronos aditus, hilarisque vicensque  
Et terit, & tritum laudat amatque locum.  
Jamque videt roseo vestitos lumine campos,  
Jam stupet attonito pectore dulce solum.  
Mox illuc celeri contendit cum Duce cursu,  
Et fortunato figit in orbe pedes.  
Tum prior hic Ales: quo litore clauderis inquit;  
Qualibus hæc surgunt regnâ sub auspiciis!  
Signa vides ex ære, vides e marmore vultus:  
Quæ bona portendant omina disce Dea.  
Ille coronatis præfulgens crinibus heros,  
Continuit victor Solis anhelus equos.  
Ille potens funda citharaque decorus & ore,  
Perculit insigni cæde Giganta Puer.  
Fortia qui multo diducit brachia nisu,  
Elisit templo mille ruente manus.  
Qui jactat siccum per culta madentia vellus,  
Tercentis pota millia stravit aqua.  
Fœmina quæ clavum prætendit læta trabalem,  
Fodit barbarici tempora fessa Ducis.  
Altera quæ rutilo præcingitur ense Virago,  
Assyrias uno vulnere fregit opes.  
Qui superat cara Genitor cum Prole cacumen,  
Quattuor ille tulit Regibus exitium.  
Cornibus auratis alter virgaque tremendus,  
Memphitæ vires fudit inermis heri.

# ❧ XI ❧

Signa sed hæc amplum quæ multa locantur in orbem,

Unde putas tantum, Diva, tenere decus?

Adspice distinctam gemmis radiisque micantem,

Et vitreo sparsam rore rosisque viam:

Hac una pergamus, & ultima meta docebit

Cur visæ cingant arva beata notæ.

Sic ait, inque globos infert se Diva coruscos,

Prodigiumque oculis excipit attonitis.

Ingens in medio consurgit litore templum:

Auro incenduntur frons, penetrale, latus.

Sexcentis moles innititur alta columnis,

Auro quæ pariter fulcra micante rigent.

Limina flammanti radiant augusta pyropo,

Quæ super hæc viridis verba smaragdus habet:

„Hanc Deus Edenis posuit pro vallibus arcem: „

„Hoc de felici crimine surgit opus. „

Legit, & arrecto subiit Dea candida vultu

Queis procul abscedit turba profana, fores.

Nec mora; digestas circumspicit ordine pompas

Regificas sanctæ Relligionis opes.

O domus, inde refert, quæ Numine digna superbis,

Quæque lates miris invenienda modis;

Quidquid inest hominum terris te semper adoret,

Semper honorato carmine, sancta, canat.

Dixit, & Aligerum medio videt agmina templo:

Horum erat ingenti juncta corona Cruci;

❧ XII ❧

Quæ tria de terna jaculatur lumina rima :  
Gemmeaque in toto stipite gutta fluit.  
Hinc radiat sertum spinisque micantibus ardet :  
Hinc tribus e clavis spicula lucis eunt.  
Crysolitho felix compacta columna refulget :  
Serica de ducto stamine flagra nitent.  
Felle vel ingrato non jam turgescit aceto  
Spongia, sed claræ lampadis instar habet.  
In nitido pictum quæ se velamine pandit,  
Illitus ardenti murice vultus erat.  
Quæ tabulam claro bisduplex litera sulco  
Findit, crystallo versicolore micat.  
Ipsam etiam argento splendens hastile videres :  
Luce nova talus, linthea, scala flagrant.  
Omnia quæ summo pendebant vertice signa :  
Cætera quadrato nixa trophæa solo.  
Nixa sedet bisseña manus, cui ( mira relatu ! )  
Lambit inoffensas flammea lingua comas.  
Hanc inter medium servat Regina, decusque  
Matris & intactæ Virginis una refert.  
Est & honos muris suus additus : omnia cernas  
Plena triumphali lumine, plena Deo.  
Virgineus tunicis chorus hic effectus in albis,  
Hic rubet indigna cæde preëmpta cohors.  
Hic qui terrarum solos coluere recessus,  
Hic in sacratis agmina clausa locis.

❧ XIII ❧

Quin & Judæi quam sustulit ira Tyranni  
Ridet, & indulget parvula turba jocis.  
Nec procul Eoi Reges, quos nobile quondam  
Sydus Bethleum compulit in stabulum.  
Hæc & plura Deæ mulcent spectacula mentem,  
Cum videt in vacuo nulla trophæa loco.  
Tunc caussam doceas, Ales bone, dixit; at Ales  
Hanc dedit, & labro risit hiantes comes.  
Felix & rerum fortunatissima Roma,  
Quam Styx atra tremit, quam Pater orbis amat,  
Quam petit invidiæ frustra dens improbus, omnes  
Eludet fremitus, despicietque minas.  
Nec satis: hostiles Capitolia ad alta phalanges  
Non vi, non ferro militis usa trahet;  
Sed quæ Relligio dat habere insignibus alma  
Stringet, & impacto compede colla teret.  
Nec mirere truci si nunc jactatur ab æstu,  
Si tempestatum turbine pressa gemit:  
Nam miris erepta modis e faucibus Orci,  
Nec sine divini Numinis aucta manu,  
Eriget alta caput mox, & secunda fruatur  
Muneribus posthac, Diva benigna, tuis.  
Inde triumphatum postquam pacaverit orbem,  
Regina in vacua parte sedebit ovans.  
Quare age, Pax, Urbis jam te te ad mœnia perfer,  
Quæ cupis ille dabit regna beata sinus.

❧ XIV ❧

Dixit, & arreptam dextra procul egit amica;  
Inque auris sese miscuit ætheriis.  
Sic habet Aligerum cœlestis regia, sic et  
Sub Vaticano Pax latet axe Dea.

F I N I S.

